

Morning Dogri (NSD) National News Bulletin 22-07-2024

आकाशवाणी

- संसद दा बजट सत्र अज्ज शुरू होग, वित्तमंत्री निर्मला सीतारमण होर अज्ज लोकसभा च आर्थिक सर्वेक्षण पेश करगंन।
- केन्द्र नै सरकारी कर्मचारिएं आस्सेआ आरएसएस गतिविधिएं च हिस्सा लैने सरबंधी प्रतिबद्ध गी हटाई दित्ता ऐ।
- हिंसक प्रदर्शनें दे चलदे बंग्लादेश थमां साढ़े 4 जहार शा बद्ध भारतीय विद्यार्थी मुख्य वापस आए।
- अमरीका दे राष्ट्रपति जो बाइडेन होरें औंदे राष्ट्रपति चुनां थमां अपना नां वापस लेई लैता ऐ।
- श्रावन महीने होने आली सालाना कांवड़ यात्रा अज्जै थमां शुरू होआ'रदी ऐ।
- भारतीय क्रिकेट बोर्ड नै भारतीय ओलंपिक संघ गी पैरिस ओलंपिक आस्तै 8 करोड़ 50 लख रपे देने दी घोषणा कीती।

<><><><><><>

Budget Session

संसद दा बजट इजलास अज्जै थमां शुरू होआ'रदा ऐ जेहड़ा औंदे महीने दी 12 तरीक तोड़ी जारी रौहग। इस केहड़े इजलास च कुल 16 बैठकां लगगंन ते 2024-25 ब'रे दा पूरा बजट बी पेश कीता जाग। साढ़े संवाददाता मूजब अज्ज पैहले रोज केन्द्री खजाना मंत्री निर्मला सीतारमण होर 2023-24 ब'रे दा आर्थिक सर्वेक्षण पेश करगंन ते कल मंगलवारें ओ लोक सभा च 2024-25 लेई बजट पेश करगंन। कल गै जम्मू कश्मीर केन्द्र शासत प्रदेश दा बजट बी पेश कीता जाग। इस इजलास दरान मेद ऐ जे सरकार 6 नमें बिल बी पेश करोग। कल सरकारै सब्बने पार्टिएं दी बैठक सदियै उंदे कोला संसद दी कारवाई रमानदारी ते बवस्था आले ढंगै सिर चलाने च सैहयोग मंगेआ।

<><><><><><>

Economic Survey

वित्त मंत्री निर्मला सीतारमण होर अज्ज संसद च आर्थिक सर्वेक्षण 2023–24 पेश करगन। एह दस्तावेज वित्त मंत्रालय च आर्थिक मामले सरबन्धी मैहकमे आस्सेआ तैआर कीता गेआ ऐ ते मुख्य आर्थिक सलाहकार डॉ. वी.अनानथा नागेश्वरम हुंदी निगरानी च तैआर कीता गेआ ऐ। इक सोशल मीडिया पोस्ट पर वित्त मंत्रालय नै आखेआ जे लोकसभा च आर्थिक सर्वेक्षण पेश होने मगरा मुख्य आर्थिक सलाहकार मीडिया गी संबोधत करगन। अर्थबवस्था ते अग्रे बी तरक्की दे नजरियै बारे सर्वेक्षण च अर्थबवस्था दी स्थिति बारे संभावनाएं ते नीतिगत चुनौतिएं बारे बी विस्तार कन्नै ब्यौरा शामिल ऐ। आर्थिक सर्वेक्षण अर्थबवस्था दे बक्ख–बक्ख क्षेत्रें बारे साख्यिक जानकारी ते विश्लेषण दे कन्नै–कन्नै रोजगार, जीडीपी बारे, मँहगाई, बजट दे बारे च आंकड़े उपलब्ध करोआंदा ऐ।

<><><><><><>

Chattisgarh Mansoon

छत्तीसगढ़ विधानसभा दा मानसून सत्र अज्जै थमां शुरू होग। इस सत्र च 5 बैठकां होंगन। सत्र दरान सरकार किश संशोधन विधेयक ते अनुपूरक बजट पेश करोग। सत्र 26 जुलाई गी समाप्त होग।

<><><><><><>

PM

प्रधानमंत्री नरेन्द्र मोदी होरें कल नमीं दिल्ली दे भारत मंडपम च विश्व विरासत समिति दे 46में सत्र दा उद्घाटन कीता। भारत पैहली बार विश्व विरासत समिति दी बैठक दी मेजबानी करा'रदा ऐ। एह बैठक इस म्हीने दी 31 तरीक तगर जारी रौहग। इस मौके पर प्रधानमंत्री होरें अपने संबोधन च आखेआ जे भारत वैश्विक सैहयोग गी बढ़ावा देने ते विरासत संरक्षण गी शामिल करने लेई प्रतिबद्ध ऐ। प्रधानमंत्री होरें अग्रे आखेआ जे भारत दा दृष्टिकोण विकास बी ऐ ते विरासत बी। उनें आखेआ जे पिछले 10एं ब'रें च भारत नै आधुनिक विकास दी नमीं उंचाइयां हासल कीतियां न ते अपनी विरासत गी संरक्षित करने लेई केई जतन बी कीते न।

इस मौके पर संस्कृति ते सैलसफा मंत्री गजेन्द्र सिंह शेखावत होरें आखेआ जे एह कार्यक्रम अंतराष्ट्रीय ते राष्ट्रीय प्रतिनिधिएं गी भारत दी समृद्ध संस्कृति विरासत ते एहदी वितिधता गी प्रदर्शत करने दा मौका बी प्रदान करदा ऐ।

<><><><><><>

RSS Ban

केन्द्र नै सरकारी कर्मचारिएं पर राष्ट्रीय स्वयं सेवक संघ—आरएसएस दी गतिविधिएं च हिस्सा लैने पर लग्गे दा प्रतिबंध हटाई लैता ऐ। नवम्बर 1966 च उसलै दी प्रधानमंत्री इंदिरा गांधी हुंदे शासनकाल दरान कार्मिक, लोक शकैत ते पेंशन मंत्रालय नै एह प्रतिबंध लागू कीता हा। बीजेपी दे आईटी सैल दे प्रमुख अमित मालवीया होरें सोशल मीडिया पोस्टें च आखेआ जे 58 ब'रे पैहले जारी एह असंवैधानिक आदेश मोदी सरकार नै वापस लेई लैता ऐ। हरियाणा, हिमाचल प्रदेश, मध्यप्रदेश ते छत्तीसगढ़ सनें केई राज्य सरकारें सरकारी कर्मचारिएं दे आरएसएस कन्नै जुड़ने पर लग्गी दी पाबंदी पैहले गै हटाइ दित्ती दी ऐ।

<><><><><><>

Bangladesh

बंगलादेश च चला'रदे हिंसक प्रदर्शन दे चलदे 4 जहार 5 सौ थमां मते भारतीय विद्यार्थी मुख्य वापस आए न। विदेश मंत्रालय नै आखेआ जे ढाका च भारतीय उच्चायोग सीमा चौकी तगर भारतीय नागरिकें दी सुरक्षत यात्रा दा प्रबंध करा'रदा ऐ।

<><><><><><>

US President

अमरीका दे राष्ट्रपति जो बाइडेन होरें राष्ट्रपति चुनां थमां अपना नां वापस लेई लैता ऐ, चुनां नवम्बर च होना ऐ। बाइडेन होरें कल रातीं अपने सोशल मीडिया पोस्ट च एह घोषणा कीती। उनें आखेआ जे अमरीका दे राष्ट्रपति दे रूपै च कम्म करना उंदे जीवन दा सब्बने थमां बड़्हा सम्मान रेआ।

<><><><><><>

Kanwar Yatra

सौन महीने होने आली सालाना कावंड यात्रा अज्जै थमां शुरू होआरदी ऐ। कावंड यात्रा च बड़ी मती गिनतरी च श्रद्धालु उत्तराखंड च हरिद्वार, गौमुख ते गंगोत्री जंदे न तां जे पवित्र गंगा दा पानी लेई सकन। उत्तराखंड ते उत्तर प्रदेश सरकारै नै व्यापक प्रबंध कीते दे न। उत्तराखंड दे मुख्यमंत्री पुष्कर सिंह धामी होरें आखेआ राज्य सरकार नै यात्रा गी सुचारू रूपे कन्नै चलाने लेई सबै लोड़चदे प्रबंध कीते दे न ते मेद बुज्झी जा'रदी ऐ जे इस ब'रे तकरीबन 5 करोड़ तगर श्रद्धालु कावंड यात्रा च शामिल होई सकदे न। साढ़े संवाददाता दी रिपोर्ट मूजब हरिद्वार च मेले आली थाहर गी 14 सुपरजोन, 31 जोन ते 126 सेक्टर च बंडेआ गेआ ऐ ते उच्चतम निगरानी लेई ड्रोन ते सीसीटीवी कैमरें दा इस्तेमाल कीता जा'रदा ऐ। एहदे कन्नै कोई बी फर्जी खबर दे फैलने थमां परहेज करने लेई सोशल मीडिया पर बी निगरानी कीती जा'रदी ऐ। इस मेले लेई तकरीबन 5 जहार 500 सुरक्षाबलें गी तैनात कीता गेआ ऐ। एहदे अलावा एह बी जकीनी बनाया जा'रदा ऐ जे यात्रा आले रस्ते सब्बने दुकानदार, होटल, अपना नां, भाएं दी सूचि, संपर्क सरबंधी जानकारी सांझा करन ते एह सब किश पुलस दी निगरानी ते तस्दीक कन्नै होना लोड़चदा। तोआई श्रद्धालु अपने अपने कावंड लेइयै हरिद्वार ते ऋषिकेश पुज्जना शुरू होई गेदे न तां जे गंगा दा पवित्र जल अपने घर लेइयै जाई सकन। एह यात्रा श्रावन शिवरात्रि आले ध्याड़े सम्पन्न होई जाग।

<><><><><><>

Amarnath Yatra

जम्मू दे भगवती नगर आले आधार शिविर थमां 3 जहार 471 श्रद्धालुएं श्री अमरनाथ जी दी यात्रा लेई रवाना होए। एह सारे श्रद्धालु 114 गड्डिडएं दे काफले च सुआर होइयै निकले। इस जत्थे च 2 जहार 620 मर्द, 720 महिला, 3 बच्चे, 93 साधु ते 34 साध्वियां शामिल न। यात्रा शुरू होने थमां लेइयै अजें तगर 3 लक्ख 95 जहार 979 श्रद्धालुएं पवित्र गुफा च मत्था टेकेआ ऐ।

<><><><><><>

Jharkhand

झारखंड च सावन दे म्हीने च मुख्य भरै थमां लक्खां बद्धे श्रद्धालु बाबा वैद्यनाथ मंदर च पूजा करने आस्तै देवघर औंदे न। एह 15 ज्योतिर्लिंगे चा इक ऐ।

<><><><><><>

Nipah

केरल च निपाह करी होइ दी मौत गी दिक्खदे होई आईसीएमआर दी 6 सदसीय माहिर टीम जन सेहत दे उपाएं च राज्य गी समर्थन देने लेई कोजीकोड पुज्जी गई ऐ। केन्द्री सेहत मंत्रालय नै राज्य दे सेहत मैहकमे गी मामले दी जांच, महामारी सरबन्धी दी पंचान ते तकनीकी मदाद देने लेई इक बहु सदसीय सांझी प्रतिक्रिया टीम तैनात करने दा फैसला कीता ऐ। आईसीएमआर नै कोजीकोड च चलने फिरने आली मोबाइल बीएसएल-3 प्रयोगशाला बी भेजी ऐ तां जे मृतक जागते दे संपर्क च रौहने आलें दे होर नमूने यानि सैंपलेंदी जांच कीती जाई सकै।

<><><><><><>

BCCI

भारतीय क्रिकेट बोर्ड दे सचिव जय शाह होरें भारतीय ओलंपिक संघ गी पैरिस आलंपिक अभियान आस्तै 8 करोड़ 50 लक्ख रुपे देने दी घोषणा कीती ऐ। युवा मामले ते खेड्डें सरबन्धी मंत्री मनसुख मांडविया होरें आर्थिक सहायता देने आस्तै शाह हुंदा धन्नबाद कीता। मांडविया होरें आखेआ जे मुख्य गी ओलंपिक खेड्डें च भारत दी अगुवाई करा'रदे हर इक खडारी पर मान ऐ। पैरिस ओलंपिक च हिस्सा लै'रदे भारतीय दल च 70 मर्द ते 47 महिला शामिल न। 140 सैह्योगी सदस्य बी एह्दे च हिस्सा लै'रदे न। 2024 पैरिस ओलंपिक खेड्डां इस म्हीने दी 26 तरीक थमां शुरू होआ'रदियां न।

<><><><><><>

Asia Cup

महिला एशिया कप टी-20 क्रिकेट च कल भारत नै यूएई गी 78 रंजें कन्ने हराया। इस जित्त कन्ने भारत नै सैमीफाइनल च थाहर पक्की करी लैती ऐ।

<><><><><><>

Weather

मौसम विभाग नै उत्तराखंड, हिमाचल प्रदेश ते गुजरात च बड़ी मती बरखा पौने दी पेशगोई कीती ऐफ। मौसम विभाग नै छत्तीसगढ़, पच्छिम उत्तर प्रदेश ते विदर्भ च भारी बरखा पोने दी पेशगोई कीती ऐ। इससै दरान केरल, माही ते पच्छिम बंगाल च अज्ज ते पंजाब, हरियाणा, चंडीगढ़, पच्छिम राजस्थान, नागालैंड, मणिपुर, मिजोरम ते त्रिपुरा च कल्लै तगरबड़ी मती बरखा होने दी गल्ल आक्खी ऐ। इससै चाल्ली दे हालात झारखंड, ओडिशा, पूर्वी राजस्थान, असम, मेघालय च अगले 3 दिनें दरान बने रौहने दी संभावना जताई ऐ।

<><><><><><>